

DOMENIE IV DI AVENT

Jutoris pe Liturgjie

Domenie, ai 22 di Dicembar dal 2019

Se la novene di Nadâl midiant dal Missus nus cjacare de fede di Marie - “Ve la sierge dal Signôr: che mi sucedi seont la tô peraule” (Lc 1, 38) - il Vanzeli di cheste domenie nus presente invezit la situazion dificile e pericolose che si cjatà Josef par vie che Marie e stave spietant.

Cheste, o podarèssin dî che e je la conte de nassite di Jesù, protagonist san Josef; e alore saltin fûr un moment dal troi de liturgjie e metînsi in companie di chest om di paîs.

+Josef al è un zovin che al met sù famee; di fat, Marie e jere imprometude a Josef;

+om di grande sensibilitât: al decidè di mandâle indaûr di scuindon;

+e discrezion; tai vanzei no esist peraule dite di lui vie pal dî;

+intant che al cjacarave ancje di gnot cul Signôr: un agnul dal Signôr i comparì in sium.

+Om responsabil tal cirî di capî la volontât di Diu: al fasè come che i veve ordenât l’agnul;

+seont cussience: al cjolè cun sè Marie ancje se la int no capive e e peteçave e forzit caluniave;

+pront a metisi di bande: te visite dai magjos nancje nol vignarà nomenât;

+ e temprât a qualsiasi pericul: al cjapà sù cun sè il frut e sô mari a dute gnot e al partì pal Egjit (Mt 2, 14).

+Josef al sparìs dai vanzei lassant di sè dome il mistîr che al faseve e che lu cualificave: il marangon (Mt 13, 55); propit come cuant che la nestre int e comentave tai funerài di une volte: chest om al à vivût come che al à podût, però al è stât un grant lavoradôr.

+Josef al è l’om de vite ordinarie di ogni dî; di lui si sa che al jere just, madûr, di pocjiis cjacaris, ma di grande responsabilitât viers la famee e di sigure fiducie-fede tal Signôr.

+E la sô vite e jere grande ancje se nissun si nacuarzeve; di fat, in lui si colmave ce che il Signôr al veve dit. E nol è pôc, anzit al è dut.

+Pensant sore, un om su chest stamp al sarà râr o plui che râr, ma o podaressin ancje vèlu dongje di cjase, o incuintrâlu par strade, o colaborâ cun lui flanc a flanc sul puest di lavôr.

+Josef nol è un “algoritmi” schedât, giudicât, butât in internet seont lis regulis anonimis e cence remission di un computer - ormai nus àn ridusûts cussì - ma il benvolût, l’elet dal Signôr, il sant dai nestrîs paîs.

Antifone di jentrade

Is 45,8

Risinait jù, cî, di adalt
e i nûi che a fasin plovi la justizie;
che si spreci la tiere e che al butuli il Salvadôr.
No si dîs Glorie a Diu.

Colete

Met, Signôr, la tô grazie tai nestrîs cûrs,
par che, daspò di vê cognossude midiant dal mes dal Agnul
l’incarnazion di Crist to Fi,
pe sô passion e crôs,
o sedin compagnâts a la glorie de resurezion.
Pal nestrî Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 7,10-14

Ve, la fantate e cjape sù e e parturis un fi.

La leture, cjapant dal Vanzeli, nus ripuarte un dai tescj plui impuartants dal Antic Testament sul Messie. O sin tal secul VIII p.d.C. tal palaç dal re di Jerusalem. Ancje se il moment al jere dramatic, Diu nol varès mancjât di dâ une dissendence al re e une salvece a Israel.

Chest test che al segne il salvadôr dal popul te linie de famee e des gjenerazions di David, al à sostignût il popul tai moments plui tragjics de sô storie.

I cristians a àn viodude e a viodin culî profetade la nassite di Jesù, ma ancje - Diu cun nô - la sô presince in ogni secul.

Dal libri dal profete Isaie

In chei dîs, il Signôr i à fevelât di gnûf a Acaz disint: «Domande par te un segnâl dal Signôr, to Diu, tant tal font des inferis che tes alticis di là sù». Ma Acaz al à rispindût: «No domandarai nuie e no tentarai il Signôr». Al à dit: «Scoltait, cjase di David! Isal pôc par vualtris stracâ i oms, che o volês stracâ ancje il gno Diu? Pa la cuâl il Signôr in persone us darà un segnâl. Ve, la fantate e cjape sù e e parturis un fi e i metarà non Emanuel: Diu cun nô».

Peraule di Diu.

SALM RESPONSORIÂL

dal Salm 23

Se la domande dal salm e je: “Cui puedial restâ te cjase dal Signôr?” la rispueste di vuê e je: “Al pues restâ Josef” e di consequence ancje i Josefs, oms e feminis, che tai tims a àn veglât spietant il Signôr. A son i sants plui vizins a la nestre condizion. La liturgjie nus vise: Cheste e je la gjernazie di chei che dal Diu di Jacop a bramin la muse; e alçaitsi puartis eternis, ve, al ven il re de glorie.

R. Ve, al ven il Signôr, il re de glorie.

Se cjantât: Il cjant dai salms responsoriâi, p. 10.

Dal Signôr e je la tiere cun dut ce che al è dentri,
il mont cun dut ce che al baline,
parcè che su lis aghis lui le à fondade
e su lis corints des aghis le à saldade. **R.**

Cui puedial lâ sù su la mont dal Signôr?
Cui puedial restâ te sô cjase sante?
Chel che al à cûr mont e mans inocentis,
che no si piert daûr di ce che nol à tignince
e che par ingjanâ nol zure. **R.**

Chest al varà la benedizion dal Signôr
e justizie dal Diu che lu salve.
Cheste e je la gjernazie di chei che lu cirin,
che dal Diu di Jacop a bramin la muse. **R.**

Alçaitsi, puartis eternis,
par che al jentri il re de glorie.
Po cui isal il re de glorie?
Il Signôr des schirris, al è lui il re de glorie. **R.**

SECONDE LETURE

Rm 1,1-7

Jesù Crist, de gjernazie di David, fi di Diu.

Ancje par san Pauli Jesù Crist, al è nassût seont la cjar de gjernazie di David, e Josef, come che nus dîs il Vanzeli al è fi, de gjernazie di David. Duncje, te riflessione de prime tradizion cristiane,

Jesù di Nazaret che o stin celebrant la nativitât, al è propit il Messie imprometût come che lis sacris scrituris nus fasin di testimoni.

De letare di san Pauli apuestul ai Romans

Pauli, servidôr di Jesù Crist, clamât a jessi apuestul, consacrât par predicjâ il vanzeli di Diu, che lui lu veve za imprometût midiant dai siei profetis tes *Scrituris santis*, a rivuart di so Fi, nassût seont la cjar de gjernazie di David, fat Fi di Diu cun fuarce seont il Spirt di santificazion midiant de resurezion dai muarts, Jesù Crist nestri Signôr. Midiant di lui o vin vude la gracie di apuestul par puartâ a l'ubidience de fede ducj i paians, a glorie dal so non. Fra di lôr o sês ancje vualtris, clamâts di Jesù Crist. A ducj chei che a son in Rome, benvolûts di Diu e clamâts a jessi sants, a ducj vualtris gracie e pâs de part di Diu, Pari nestri, e dal Signôr Jesù Crist.
Peraule di Diu.

CJANT AL VANZELI

Mt 1,23

R. Aleluia, aleluia.

Ve, la virgjine e cjaparà sù e e parturissarà un fi che i metaran non Emanuel: "Diu cun nô".

R. Aleluia.

VANZELI

Mt 1,18-24

Jesù al nassarà di Marie, femine di Josef, de gjernazie di David.

In chest vanzeli o vin prime di dut di tignî ben presint che Matieu nol vûl tramandânus un fat di cronache - cemut che al è nassût Jesù - ma la riflessione des primis comunitâts cristianis sul misteri dal frut Jesù. Par chest motîf al trasforme la cronache di une nassite tune riflessione su lis antighis sacris scrituris. Risultât: alc dai fats sucedûts e tante esegjesi, tradizion religjose, teologjie.

In pluî, Matieu par contânus de relazion di Josef cun Diu, al dopre un gjenar leterari cjar ai siei tims: l'insumiâsi. Te antichitât il sium al jere un mieç par ponisi in comunicazion cu la divinitât. Ancje il patriarcje Jacop, so fi Josef e il zovin re Salomon a vevin vût siums mistereôs, (cf. Gjen 28, 12; 37, 6; 1 Res 3, 5), e cussì Josef l'om di Marie.

I siums di Josef nus cjacarin de sô continue ricercje di cognossi te proprie vite la volontât di Diu. Come che ancje nô o domandìn te preiere: Pari nestri, che e sedi fate la tô volontât come in cîl, cussì in tiere (cf. Mt 6, 9. 10).

Te cronache e te riflessione dal vanzeli, domandìn cumò la gracie dal Spirtu Sant che nus dedi qualche lum spirtuâl in preparazion a la Nativitât dal Fantulin..

Dal vanzeli seont Matieu

La nassite di Jesù e je sucedude cussì: sô mari Marie e jere imprometude a Josef; ma prime che lôr a tacassin a stâ insieme, al sucedè che jê e veve cjapât sù midiant dal Spirtu Sant. Josef, il so om, che al jere just e nol voleve disonorâle denant di ducj, al decidè di mandâle indaûr di scuindon. Cuant che al veve za cjapade cheste decision, ve che un agnul dal Signôr i comparì in sium par dîi: «Josef, fi di David, no sta vê pôre a cjoli cun te Marie, la tô femine: ce che al è stât gjenerât in jê al è opare dal Spirtu Sant. E parturissarà un frut e tu i metarâs non Jesù; al sarà lui di fat che al salvarà il so popul dai siei pecjâts».

Dut chest al è sucedût par che si colmàs ce che il Signôr al veve dit midiant dal profete: "Ve, la virgjine e cjaparà sù e e parturissarà un fi che i metaran non Emanuel", che al vûl dî "Diu cun nô". Disveât dal sium, Josef al fasè come che i veve ordenât l'agnul dal Signôr e al cjolè cun sé la sô femine.

Peraule dal Signôr.

Si dîs O crôt.

Su lis ufiertis

Acete, Signôr, i regâi che o presentin sul altâr
e consacriju cul to Spirt,
che al à jemplât cu la sô virtût il grim de sante Marie.
Par Crist nestri Signôr.

Antifone a la comunion

Ve, la fantate e cjape sù
e e parturìs un fi
e i metarà non Emanuel.

Is 7,14

Daspò de comunion

Diu, che tu nus âs dade la capare de vite eterne,
scolte la nestre preiere:
plui si fâs dongje la grande zornade de nestre salvece
e plui la nestre religion e cressi,
in mût di celebrâ in maniere degne il misteri de nativitât di to Fi.
Lui che al vîf e al regne tai secui dai secui.

* * *

Cjants di Avent: dal numar 88 al numar 97.

- 88 - La gnove scoltait
- 89 - Rorate caeli desuper
- 90 - Inte gnot la vôs nus clame
- 91 - No sta vê pôre
- 92 - Ormai al è dongje
- 93 - Viergêt lis quartis dal lûc sant
- 94 - A son oms che no àn nuie
- 95 - Il Redentore ascolta la nostra voce
- 96 - Tu, quando verrai, Signore Gesù
- 97 - Vieni, Sapienza altissima

Salm 84: Tu sês stât bon Signôr cu la tô tiere, *n.* 257.

* * *

Bon Nadâl

*cu la Madone, Josef e i pastôrs;
cu la nestre int,
tal soreli che de gnot al nas ogni dì;
fra i siums che si spere,
ilusions che nus smontin,
inidents di percors che nus copin;
fra lis tantis domandis,
opinions, riflessions
che i agns,
societât, vite e glesie a compartin.
Bon Nadâl;*

*il Signôr simpri al torne
tal misteri di lûs
di un cûl puntinât,
di une rose o de albe,
o te tenere muse di une frute,
di un frut.*

*Bon Nadâl;
l'amôr che al va a mont,
si plate un moment
ma nol mûr.*

No sin di bessôi.

*O sin tancj, o sin ducj;
ce che in cûr al bat vuê
lu bateve ancje îr,
ancje in lôr,
in Marie e Josef
che a stan lant viers Betlem.*

*Bon Nadâl,
ancje se rivâts in ritart,
fûr orari,
e il tren al è partît e pierdût;
ancje se nol jere par lôr,
e nancje par me
puest te locande,
parcè che te vite
al sucêt simpri cussì.*

Bon Nadâl.

*Nol covente gran che.
Si pues vivi ancje in preson,
presons inclostradis
de vite di vuê.*

*Il Signôr al ven
e al rive par ducj;
a bastin
il lum de fede te gnot
e il clip di un afiet
dentri il cûr.*

*Si cjatarin a Betlem
che al vûl dî:*

Cjase dal pan.

*Pan dal Signôr,
di une amie o un amî;
e indi baste un fruçon
par colmâ il cûr di gjonde.*

*A dispîet de ilusion
de lune tal poç.*

Amen.

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- * *Par domandâ chescj libris scrivêt a info@glesiefurlane.org*